

論語何氏等集解

冊二

THE NEW YORK PUBLIC LIBRARY
ASTOR LENOX TILDEN FOUNDATION
1895

11

論語卷十一

魏尚書駙馬都尉關內侯南陽何晏集解

明後學東吳金蟠較訂

先進第十一

子曰先進於禮樂野人也後進於禮樂君子也

孔曰先進後進謂仕先後輩也禮樂因世損益後進與禮樂俱得時之中斯君子矣先進有古風斯野人也

如用之則吾從先進

將移風易俗歸之淳素先進猶近古風故從之

子曰從我於陳蔡者皆不及門也

鄭曰言弟子從我而厄於陳蔡者皆不及仕進之門而失其所

德行顏淵閔子騫冉伯牛仲弓言語宰我子貢政事

冉有季路文學子游子夏

子曰回也非助我者也於吾言無所不說

孔曰助益也言回聞言即解無發起增益於己

子曰孝哉閔子騫人不間於其父母昆弟之言

陳曰言子騫上事父母下順兄弟動靜盡善故人不得有非間之言

南容三復白圭

孔曰詩云白圭之玷尚可磨也斯言之玷不可為也南容讀書至此三反覆之是其心慎言也

孔子以其兄之子妻之

季康子問弟子孰爲好學。孔子對曰：有顏回者好學。不幸短命死矣。今也則亡。

顏淵死。顏路請子之車以爲之槨。

孔曰：路，淵父也。家貧欲請孔子之車賣以作槨。

子曰：才不才，亦各言其子也。鯉也死，有棺而無槨。吾不徒行以爲之槨，以吾從大夫之後，不可徒行也。

孔曰：鯉，孔子之子伯魚也。孔子時爲大夫，言從大夫之後，不可以徒行，謙辭也。

顏淵死。子曰：噫。

包曰：噫，痛傷之聲。

天喪予。天喪予。

天喪予者。若喪己也。再言之者。痛惜之甚。

顏淵死。子哭之慟。

馬曰。慟。哀過也。

從者曰。子慟矣。曰。有慟乎。

孔曰。不自知己之悲哀過。

非夫人之爲慟。而誰爲。

顏淵死。門人欲厚葬之。子曰。不可。

禮。貧富有宜。顏淵貧而門人欲厚葬之。故不聽。

門人厚葬之。子曰。回也。視予猶父也。予不得視猶

子也。非我也。夫二三子也。

馬曰：顏回自父父意欲聽門人厚葬，我不得割止，非其厚葬，故云耳。

季路問事鬼神。子曰：未能事人，焉能事鬼。曰：敢問死。

曰：未知生，焉知死。

陳曰：鬼神及死事難明，語之無益，故不答。

閔子侍側。閭閻如也。子路行行如也。冉有子貢侃侃

如也。子樂。

鄭曰：樂各盡其性，行行剛強之貌。

若由也，不得其死然。

孔曰：不得以壽終。

魯人爲長府。閔子騫曰。仍舊貫。如之何。何必改作。

鄭曰。長府。藏名也。藏財貨曰府。仍。因也。貫。事也。因舊事則可也。何。乃復更改作也。

子曰。夫人不言。言必有中。

王曰。言必有中者。善其不欲勞民改作。

子曰。由之瑟。奚爲於丘之門。

馬曰。子路鼓瑟不合雅頌。

門人不敬子路。子曰。由也升堂矣。未入於室也。

馬曰。升我堂矣。未入於室耳。門人不解。謂孔子言爲賤子路。故復解之。

子貢問師與商也孰賢。子曰。師也過。商也不及。

孔曰。言俱不得中。

曰。然則師愈與。子曰。過猶不及。

愈猶勝也。

季氏富於周公。

子曰。周公天子之宰。卿士。

而求也爲之聚斂而附益之。

孔曰。冉求爲季氏宰。爲之急賦稅。

子曰。非吾徒也。小子鳴鼓而攻之可也。

鄭曰。小子。門人也。鳴鼓。聲其罪以責之。

柴也愚。

弟子高柴字子羔。愚。愚直之愚。

參也魯。

孔曰魯鈍也。曾子性遲鈍。

師也辟。

馬曰子張才過人。失在邪辟。文過。

由也嘒。

鄭曰子路之行失於畔嘒。

子曰。回也其庶乎。屢空。賜不受命而貨殖焉。億則

屢中。

言回庶幾聖道。雖數空。而樂在其中。賜不受教。命。唯財貨是殖。億度是非。蓋美回所以勵賜也。一

曰。屢猶每也。空猶虛中也。以聖人之善道教數子之庶幾。猶不至於知道者。各內有此害。其於庶幾

每能虛中者。唯回懷道深遠。不虛心。不能知道。子貢雖無數子之病。然亦不知道者。雖不窮理而幸。中雖非天命而偶富。亦所以不虛心也。

子張問善人之道。子曰。不踐迹。亦不入於室。

孔曰。踐。循也。言善人不但循追舊迹而已。亦少能創業。然亦不入於聖人之奧室。

子曰。論篤是與。君子者乎。色莊者乎。

論篤者。謂口無擇言。君子者。謂身無鄙行。色莊者。不惡而嚴。以遠小人。言此三者。皆可以爲善人。

子路問聞斯行諸。

包曰。賑窮救乏之事。

子曰。有父兄在。如之何其聞斯行之。

孔曰。當白父兄。不得自專。

冉有問聞斯行諸。子曰。聞斯行之。公西華曰。由也問聞斯行諸。子曰。有父兄在。求也問聞斯行諸。子曰。聞斯行之。赤也惑。敢問。

子曰。惑其問同而答異。

子曰。求也退。故進之。由也兼人。故退之。

鄭曰。言冉有性謙退。子路務在勝尚人。各因其人之失而正之。

子畏於匡。顏淵後。

子曰。言與孔子相失。故在後。

子曰。吾以女爲死矣。曰。子在。回何敢死。

包曰。言夫子在己無所敢死。

季子然問仲由冉求可謂大臣與。

孔曰：子然，季氏子弟，自多得臣，此二子故問之。

子曰：吾以子爲異之問，曾由與求之問。

孔曰：謂子問異事耳，則此二人之問安足大乎？

所謂大臣者，以道事君，不可則止。今由與求也可。

謂具臣矣。

孔曰：言備臣數而已。

曰：然則從之者與？

孔曰：問爲臣皆當從君所欲邪？

子曰：弑父與君，亦不從也。

孔曰言二子雖從其主亦不與爲大逆

子路使子羔爲費宰。子曰：賊夫人之子。

包曰子羔學未熟習而使爲政所以爲賊害而

子路曰：有民人焉，有社稷焉，何必讀書，然後爲學。

孔曰言治民事神於是而習之亦學也

子曰：是故惡夫佞者。

孔曰疾其不以口給應遂已非而不知窮

子路、曾皙、

孔曰皙曾參父名點

冉有、公西華侍坐。子曰：以吾一日長乎爾，毋吾以

也。

孔曰言我問女女無以我長故難對

居則曰不吾知也。

孔曰女常居云人不知己

如或知爾則何以哉。

孔曰如有用女者則何以爲治

子路率爾而對。

率爾先三人對

曰千乘之國攝乎大國之間。加之以師旅。因之以

饑饉。

包曰攝迫也迫於大國之間

由也爲之比及三年可使有勇且知方也

方方義

夫子哂之

馬曰哂笑

求爾何如對曰方六七十如五六十

求性謙退言欲得方六七十如五六十里小國治之而已

求也爲之比及三年可使足民如其禮樂以俟君

子

孔曰求自云能足民而已謂衣食足也若禮樂之化當以待君子謙也

赤爾何如。對曰：非曰能之，願學焉。宗廟之事，如會同、端章甫，願爲小相焉。

鄭曰：我非自言能，願學爲之。宗廟之事，謂祭祀也。諸侯時見曰會，衆視曰同。端，玄端也。衣，玄端冠章甫。相，謂相君之禮。

點爾何如？鼓瑟希。

孔曰：思所以對，故音希。

鉦爾舍瑟而作。對曰：異乎三子者之撰。

孔曰：置瑟起對，撰，具也。爲政之具，鉦者投瑟之聲。

子曰：何傷乎？亦各言其志也。

孔曰：各言己志，於義無傷。